

100 ani dala spartizion dl popul ladin

N juebia dl'ena passeda iel stat na manifestazion tla Cësa dla Pëisa a Bulsan, n cunlaurazion cum l Istitut Ladin Cesa de Jan, per lecurdè i cënt ani dala spartizion dl popul ladin, cum focus sun Sëuramont

La secretera generela dl'Euregio Marilena Defrancesco à pudù saludé la pitla sala, tla sënta dla Cësa dla Pëisa a Bulsan, plëina de jënt, y à sottrissà coche «l'Euregio à for abù a cuer la cuestion di chemuns ladins de Sëuramont, che ne n'ìa nia la medema autonomia coche la valedes ladines dla Provinzia de Bulsan y Trënt.» Defrancesco à nce dat da lecurdè che la manifestazion ie unida metuda a ji n cunlaurazion cum l Istitut Ladin Cesa de Jan.

Danter l'autoriteies fövel prejënt l digan dla Facultà de Scienzes dla Furmazion a Persenon dla Università Liedia de Bulsan, Paul Videsott, la vizepresidënta dla Union Generela di Ladins dla Dolomites, Milva Mussner, la ntendënta scolastica ladina dla Provinzia de Bulsan, Edith Ploner, y l ambolt de Corvara, Giorgio Costabiei.

L assessëur regiunel dl Trentin-Südtirol per la mendranzes, Manfred Vallazza, ne n'ìa pudù vester prejënt, y nsci à lascià liejer dant si paroles, te chèles che l à sottrissà, danter l auter, coche «nëus ladins messon desmustré che tenion adum» y «che l referendum vënie recunesciù», coche nce la mpermetuda che «purveré a dé mi cuntribut acioche saronse inò duc deberieda te una na region.»

Denni Dorigo, diretëur dl Istitut Ladin Cesa de Jan, à sottrissà che «purtruëp, ncuei, udons i resultat de chël «divide et impera»: nostra rujeneda de mendranza y nsci tl medemo mumënt nosta cumenanza, nosta identità y nosta cultura, resieia de uni safuieda y asfaltada da na cultura «venetica» che nes ncërta lte y prova a nes nglubé di per di.»



Tla Cësa dla Pëisa a Bulsan iel uni rujenà de Sëuramont tl cheder di cënt ani dala spartizion dl popul ladin.

Foto: Eusebio Armin Gladen

La prutagunistes dla sëira a Bulsan ie states trëi ëiles, che à reprejentà trëi persunajes nventedes: Elsa ie n'ëila ampezana de 44 ani tl 1912, Giulia ie de Col y à 25 ani tl 1946 y Milly ie na jëuna fedoma che reiona tl 2023. La trëi ëiles ie dancà, mpe, cum dovia na reprejentanza culturela de si raion, tres trëi lies: i scizeri, la lia dla trohtes, la Mujiga. La grupa

fedoma Kropya à abeli la sëira cum si ujës y meludies.

La trëi ëiles, nce sce te trëi tèmps desferënc, à cuntà stories che se semea, che à n fil cueciun. Stories de jënt stluta ora, monce te si ncësa, de jënt che à messù mucé y che se sënt fulestiera monce a cësa. De jënt che à abù da strité cum la cumenanza, per cuestions dla opzion

tl 1939, per fé n ejëmpl. De jënt che vën cuineda a Persenon ajache la ne sà nia tudësch o ajache «i drë' ladins ie chëi de Gherdëina y dla Val Badia», per tò ca d'otra doi anedotes cuntedes ntan la manifestazion. Stories de jënt che ne n'ìa nia l ladin a scola, y che ne ntënd nia ciuldì. Ma pona nce de jënt cum gran stolz per si storia y cultura.

Cun gran soltz per si rujeneda, per si atività de ulentariat tla lies, per si cuntribut ala vita soziela. Nsciama, stories de jënt ladina de Sëuramont, che se damanda de pudëi cunté si storia y si vita da uni di te n cuntest che la à perdù.

Bruno Maruca